



VI. a. 126.



61

CIMELIA

*Historia morum et rituum
sacerdotum.*

Teol. 4672

*Cromosi Martini: Sermo de
tuenda dignitate sacerdotii,
Petrivorianum synodo habi-
tus.*

Crae. in off. Angl. 1592

Cr. 64

MARTINI
CHAMPAGNE

MARTINI
CROMERI SERMO
DE TVENDA DIGNITATE
SACERDOTII, PETRI-
COVIÆ IN SYNO-
DO HABITVS.

Cim. 0. 61.



CRACOVIAE, In Officina Vngle. M.D.XLII.

AMPLISSIMO PRINCIPI ET DO.
PETRO GAMRATHO . DEI
GRATIA ARCHIEPISCO

po Gneznē. Legato nato, Prima
ti Poloniae, & Episcopo Cra-
conien. patrono suo be-
nificētissimo,

Mar-
tinus Cromerus
S. P. D.

S Ermonem, quem te authore Antistes amplissime
in synodo nuper abs te coacta habuimus, de tua
enda dignitate sacerdotij, multis efflagitantibus, &
ipso te authore in lucem ædimus, omnibus penē ora-
torum fucis & ornamentis nudum: cum q. maxime
talem esse conuenit ueritatis orationem, tum q. tem-
pori & auditorum ingenijs seruiendum fuit: & ut
uerum fatear, nostra hæc aulica scribendi cōsuetudo
me natura tenuem, magis etiam limauit. Ad hæc aut
ocio neq. tunc abundabamus, neq. etiamnum abunda-
mus: quò sane opus est ei, qui ornate quid & copi-
ose dicere uelit, aut scribere præsertim de rebus tan-
tis tamq. uarijs: sed hoc accipiat, ut quisq. uolet.
Mihi satis erit, si res necessarias uulgo sacerdotum,
non ineptissime uidebor esse persecutus. In re si quid
forte offendi, tuum id erit præstare Antistes optime
qui mihi author ad id fuisti, meq. tuendum & ornā-

dum suscepisti. Eidem autem tibi cura imprimis esse debet, ut omnes sacerdotes, quorum tu princeps es in his oris, et exemplo tuo moniti, et autoritate adacti dignitatem suam, secundum præscriptum hoc nostrum (si modo rectum id est, quemadmodum tu iudicas) tueantur: quem nos unum longe uberrimum nostri huius laboris fructum expetimus. Vale.



MARTINI

CROMERI SERMO

DE TVENDA DIGNITATE SACER-
DOTII, PETRICOVIÆ IN
SYNODO HABITVS.



Larissimus hic dies illuxit, Patres amplissimi, et bonis omnibus piisq; exoptatus, quo ex diuersis et longinquis oris, principes religionis, et flos ex omni cœtu sacerdotum in hunc locum conuenistis, de sacri ordinis uestri dignitate tuenda, et incolumitate stabilienda, deq; pietate quæ iacet pro dolor afflictæ et profligatæ, in animis hominum excitanda. Quibus de rebus cum sermonem apud uos inicio de more haberi uelit, uereor magnopere ut iustam impudentiæ reprehensionem euitare queam, quod sacris nondum iniciatus, apud sacerdotes, iuuenis apud uiros grauissimos, imperitus apud eos, qui et doctrina, et usu rerum maximarum præstant, de rebus maximis uerba facere productus sum. Sed non potui recte auctoritatem eius, qui huic sacro conuentui præest, principis mei beneficentissimi defugere. Ad hæc autem studium pietatis, quo ab ineunte puericia semper flagraui, me

A iij ad eam

ad eam provinciam quamvis grauem, suscipiendam inuitum penè impulit. Tametsi in bello quoq; non imperatores, non legatos, non centuriones, non ueteranos milites, ac ne tyrones quidem, sed imbelles & ignauos tubicines classicum canere, ac tubarum, tybarum, tympanorumq; sono instructas acies ad praelium excitare, aut uero inermes lixas & calones clamore id facere solere animaduertimus. Quo fit, ut mihi in re haud multo dissimili ueniā duntaxat à uobis Patres amplissimi datam iri confidam. Dicant autem q̄ potero paucissimis, primum de dignitate sacerdotij: sacerdotum autem nomine, uniuersum ordinem sacrum, summos pariter cū imis complectar: deinde quibus rebus eam dignitatem quemq; tueri oporteat. Quod dum perago, quaeso ut me dicentem Patres amplissimi benigne audiat. Fuerūt igitur & apud priscos mortales, falsorū deorum cultores, summo in honore sacerdotes, deorum interpretes, sacrorum & ceremoniarum magistri: summaq; penes eos potestas erat, quippe qui iidem reges essent. Vnde est illud poëticum.

Rex Anius, rex idem hominum Phœbiq; sacerdos
Nec licebat regem esse, ut est apud Platonem, qui sacerdos non esset. Hodieq; adeo apud eas gentes, quæ Machometi impietatem sectantur, & si nō reges, certe arbitri regionum iudiciorum atq; consiliorum esse dicuntur sacerdotes. Sed non de his institutus ē nobis sermo. Summa fuit & apud Hæbreos ueri

Dei

Dei cultores, sacerdotij dignitas. Sed nihil ad rhombum, ut est in ueteri prouerbio. Apud illos enim umbra fuit, & tenuis quædam quasi carbone deliniata imago sacerdotij: apud nos uerum est sacerdotium, Cuius authorem atq; principem habemus CHRISTVM IESVM, Deum atq; hominem, qui sacerdos est in æternum secundum ordinem Melchisedech, spiritu sancto à Deo patre unctus: qui inter innumerabilia atq; immensa amoris erga nos sui monumenta, nullum maius, nullum præstantius, nullum admirabilius nobis reliquit sacerdotio. Etsi enim semel ipse omnino introiuit in sancta sanctorum, æterna nobis redemptione inuenta, tamen quia quotidie omnes labimur, Deumq; offendimus, hos nobis, sacerdotes inquam, pro se præsentis medicos, opiferos, deprecatores, pacificatores, uitæ moderatores, & quasi terrena quædam numina semper adesse uoluit, tradita ipsis potestate ligandi atq; soluendi omnia in terris & in cœlis: ut paratū semper in malis, quæ plurima uitam nostram infestant, auxilium haberemus. Nam ut ij, & Deum nobis placarent, & nos Deo adiungerent: illud orando, & sacris operando: hoc docendo, & mysterijs iniciando. Itaq; ergo insignibus titulis eos ornauit, & aplissimis luculentissimisque muneribus locupletauit. Nam & pastores eos communi cū regibus nomine (pastores enim populorū, olim reges dicebantur) & sal terræ, & amicos fratresq; suos, & lucem mundi, sua omnia cum eis communicans, nuncupauit: & uero super familiam, atq;

super omnia bona sua constituit, clauēq; regni cœlestis, & claritatem eam, quam ipse à patre accepit, de dit eis. Spiritus quinetiam sanctus in diuinis scripturis Apostolorum, Angelorum, ministrorū uerbi Dei, Christorum, ac deorum deniq; nomine eos dignatus ē: dispensatoresq; mysteriorum Dei, conciliatores ac pacificatores Dei & hominum, & principes super omnem terram constituit. Cogitate mihi quaeso Patres, etiam atq; etiam, quanta sit uestra ista dignitas, & superbos Ducum, Imperatorum, Regum, Caesarū semper augustorum, foeliciū, piorum, uictorum, triumphatorum, domitorum orbis, patrum patrie, & nescio quos non titulos cum uestris comparate: omnes honores mundanos, omnia munera, & magistratus in unam lancem congerite: ex aduerso aut sacerdotium ponite, iustaq; & exacta trutina expendite: uidebitis proculdubio infinitis partibus uestrae functionis præstantiam præponderare, leuiq; ac ludicra esse omnia, quæ summo studio ab hominibus in hac uita expetuntur, præ sacerdotij dignitate. Etenim sacerdotium in terra quidem peragitur, sed in rerum cœlestium classē ordinemq; referendum est, ut inquit Chrysostomus. Et nescio num Angelorum etiam & omnium cœlestium beatarumq; mentium excellentiam sacerdotij dignitas superet. Quem enim purissima illæ mentes tremebundæ adorant Deum atq; hominem CHRISTVM IESVM, hunc quiuis sacerdos, quoties uult de cœlo deuocat, mortalibus manibus

bus familiariter attrectat, & in uiscera sua aliorumq; transmittit. Spiritum quoq; sanctum pari, immo uero eadem cum patre filioq; potestate ac diuinitate, in quem ijdem illi Angeli ardent prospicere, sola maius impositione quibus uult largitur. O immensam Dei bonitatem, o excellentem sacerdotij præstantiam, o admirabilem sacerdotū potestatem: quem cœli & terra comprehendere nequeunt: cui luna, sol & stellæ omnes seruiunt: cui omne genu flexitur, cœlestiū, terrenorum pariter & inferorum: hunc homo uult, & euandus puluisculus, medicus Regem, seruus Dominum, opus opificem, pauculis uerbis adactum, quodammodo arbitratus suo tractat, circumfert, distribuit & salute uitq; æterna quos uult impertitur: quando eum dat sine quo salutem uitamq; habere nemo potest. Quid hoc amplius? quid præstabilius? quid diuinius humano generi à Deo opti: maxi: dari potuit? Dij quidam profecto carne & ossibus uestiti uideri debent sacerdotes. Et fuit sanè apud maiores nostros ea persuasio, ut quā domo sacerdos receptus esset, quasi deo ingressō, omnia in eam domum bona, omnesq; foelicitates accumulatum iri crederentur. Itinera atq; negotia omnia prospere euentura existimabantur, quibus sacerdos interuenisset. In foro, in compitis, in angiportis, in uis uiso sacerdoti passim apud Christianos populos occurrebatur, acclamabatur, ad genua etiam pedesq; procumbebatur. Vnde mos inoleuisse creditur, ferenda crucis Episcopis, ut

ne sibi, sed CHRISTO cum honorem haberi putarent: utq; meminissent, cuius essent uicarij. Summa quidem certe erat ubiq; reuerentia sacerdoti, non modo apud uulgus hominum, sed & apud Principes, & summos monarchas: non modo priuatim, sed & publice: nec apud suos modo, sed & apud hostes. An enim non legimus Constantinum magnū imperatorem, sacerdotum iudicia à se reieciſſe, quod eos à solo Deo iudicari, aut inter se duntaxat controversias suas disceptare oportere diceret. Longe aliter q̄ nunc fit nonnuſq;: ubi prophani homines sacerdotum proſcribendorum, nedū iudicandorū potestatem indigniſſime ſibi arroganti, aut uerius à sacerdotibus ipsis (liceat enim uerum dicere) cupidis & ambicioſis conſeſſam, ne dicam obtruſam, nō reſuſant. Vbi cernere eſt præclarum ſcilicet ſpectaculum. Citatur à trūculento apparitore reus ſacerdos: comparet: adſtat coram ſeuero & odio ſacerdotum inflammato iudice, quaſi agnus coram tōdente, & ſicuti CHRISTVS meus coram Herode aut Pilato: Prodit in medium trux, quiſpiam ac deformata cicatricibus facie accuſator: accuſat reum acriter & contumelioſe appellat, proferuntur qualia qualia teſtimonia: ſtat interim reus demisso capite: ſi quid reſpondere ipſe proſe (nā & hoc cūctetur, ne quis eum defendat) ſi quid ergo reſpondere pro ſe incipiat, appoſiti ſunt, qui eum ſtrepitu & clamore excipiant atq; perturbent, in totum ordinē ſacerdotū indigne

indigne debachātes. Aſtuat ille, & in omnes partes ſeſe uerſans, tantum non ſuneſta illa uerba iudicis expectat: I licitor, colliga manus, caput obnubito, arbori inſeſelici ſuſpendito. Sed tamen mitiori ſine iudicium terminatur, ſola ſcilicet proſcriptione. Et cū his factis atq; legibus uideri uolumus Chriſtiani. Sed aliō, quam inſtitueramus, impetu quodam noſtra proſecta eſt oratio. Ad rem igitur redeo. Maximum ſane honorem pientiffimus ille imperator Conſtantineſus inquam, habuit ſacerdotibus. Quid Theodoſius, cū propter admiſſum temere facinus templi ingreſſu ab Ambroſio Mediolanenſi. Archiepiſcopo prohiberetur, ac deinde impetrata uenia admiſſus ab Archidiacono eiufdem eccleſiæ, ab ſecretiore parte templi depelleretur: nōne manſuetiſſimo & equiſſimo animo paruit? An non legimus furentium & caſte religioni inſeſtorum regum ferocitatem à Baſilio Cappadocum Epicoſcopo emolitam? De quo præclare & illud Gregorius Nazianzenus, unam ſibi ſalutem populos duxiſſe ſub ipſo & cum ipſo eſſe, unū periculum, ipſi aduerſari, & à Deo ſe alienos exiſtimariſſe, ſi ab illo diſſentirent. Quid Leo Romanus Pontifex? nonne Attilam Hunnorum regem barbariſſimo animo ad opprimendam & euertendam Italiam cum exercitu contendentem, aſpectu & oratione ſola repreſſit & auertit? Fuit, fuit ſumma quondam ſacerdotum dignitas: quæ noſtro ſeculo pro dolor in contrarium planē recidit. Quamob-

rem? Quia recte illi dignitatem suam tuebantur: nos non modo non tuemur, sed fortassis ipsi etiam deprimimus. Quibus ergo rebus tueri eam nos oportet? Dicam Patres amplissimi, quæ fuit altera pars instituti sermonis nostri: Nec nimium uos remorabor: uos quod fecistis adhuc, æquis auribus atq; animis queso attendite.

Quid igitur est, quo hanc ipsam dignitatem tueri debemus? num stipatorum & satellitum præeuntium & subsequentium longa agmina, æquitumq; turmæ auro & argenteo aspicientium oculos perstringentes? num tubæ, tibie, atq; tympana? num laxæ, molles, & præciosæ uestes? num regales seu potius pontificales mensarum apparatus apud prisas gentes celebrati? num generis claritas, & nouæ istæ de non recipiendis plebeis ad primarias ecclesias constitutiones, uirtuti uiam præcludentes, & cum uerbo Dei, nisi fallor, pugnantes? num intolerabilis iste fastus, qui in templis Dei, ad aras, & ad ipsum quoq; sacrosanctum humilis & mitissimus CHRISTI IESU sacrificium nuper pro pudor irrepserat? num profusa largitio? num gratia principum? num spes beneficii? an uero pecuniarum & cupide ac iniuste questu, & sordidi misereq; conclusi cumuli? an uero terror, carcer, uincula, uerbera, rogus, ac omnis supplicij motus hominibus propositus? nihil horum sane. Alioqui multo amplior esset nostri temporis sacerdotum dignitas, quæ priscorum illorum fuit. Longè enim hæc in nobis exuberant,

quæ

quæ in illis exigua, aut uerius nulla extiterunt. Quæ cum partim inuidiosa, partim odiosa sint, nescio an magis etiam dignitatem eorum, qui his abundant, labefactent. Veram quidem certe ac stabilem beneuolentiam, quæ optima est conciliatrix & custos dignitatis, non parant. Sed fuit in priscis illis sacerdotibus morum sanctimonia, puritas uitæ, mirum pietatis studium, ardens in Deum amor, incredibilis charitas proximi, & recto iudicio librata in omnes beneuolentia.

Non indocti ac dissoluti iuuenes, atq; pueri, aut pueris non minus inepti senes à profanis negocijs, uilibusq; ac etiam turpibus interdum obsequijs principum ad sacerdotium aspirabant: non præcibus, præcio, ui atq; potentia irrumpebant: non malis artibus sese ingerebant: non propinquorum ac necessariorum ope, atq; peruerso studio intrudebantur: non deniq; magister quisquam prius fiebat, quàm fuisset discipulus: nec ad regimen admouebatur, qui subesse prius ipse non didicisset: at uiri graues & maturi, qui doctrinam pariter atq; innocentiam suam omnibus ab ineunte ætate probauissent, à collegio sacerdotum, approbante populo rite & religiose in eum ordinem coaptabantur, atq; è latebris, & ex monasterijs ac cœnobijs, quæ tum scholæ erant pietatis & religionis, inuiti ad sacerdotium protrahabantur. Cerebant illi nimirum, quàm graue onus esset sacerdotium. Neq; ad ocium, aut ad commodum ullum suum, fastumq; id ambiebant: sed obtrusum propter Deum uolent.

nolentem atq; iubentem, ut qui ipsum diligeret, pasce-
ret oues ipsius, mœtuq; poenæ talenti absconsi non ob-
stinatè recusabant. Cuius rei præclara habemus ex-
empla in Basilio & Chrysostomo: Itaq; & popu-
lus, quemadmodum par erat, de talibus exstimabat:
eos qui sic per ostium ad sacerdotium ingressi essent,
non fures aut latrones, mercenariosue, sed pastores
futuros, neq; suis cupiditatibus seruituros, sed ad glo-
riam Dei, & populi salutem, consilia & actiones om-
nes suas relatu-ros. Et respondebant sanè illis tali-
bus inicijs, hominumq; expectationi consequentia.
Nam tota uita publice quidem in sacris peragendis,
docendo & exhortando populo, moribus corrigen-
dis, & propaganda quoquo uersus religione, priua-
tim uero in præcatione & meditatione rerum diuina-
rum, & assidua sacra scriptura lectione ipsis consu-
mebatur, ita ut præcationi lectio, lectioni præcatio ui-
cissim succederet. Neq; uero quisq; aditu prohibeba-
tur, quicumq; uel consilij, uel auxilij, quid rebus suis
expetitur uenisset: somnus, cibus, potusq; modice, &
non ad uoluptatem aut facietatem, sed ad necessitatē
tantum sumebatur: ludos, lusus, atq; ocium, omnino
perinde atq; pestem fugiebant: à mulierum contuber-
nio & consuetudine, ac familiari secretoq; colloquio
etiam earum, in quas propter arctam propinquitatē
nihil suspitionis caderet, procul se summovebant: tan-
tum aberat, ut quidpiam rei earum arbitrio gererent
Aulas profanorum principum, tanquā corruptelam
morum

morum, & infames syrenum scopulos Cyrcæ sue do-
mos uitabant, ne quibus illecebris, quarum ibi regnū
est, irretiti, aut uenenis quibusdam ac prestigijs in be-
luis mutati hærent, neue quid indecorum, quo dig-
nitatem suam minuerent, facere, loquiue cogerentur:
nec in conspectum principum ueniebant, nisi ut eos à
præuis, iniustis atq; perniciosis consilijs & conatibus
dehortarentur: ad rectos, iustos, & salutare, adhor-
tarentur: aut afflictis uiduis & pupillis ut adessent,
aut rei cuiuspiam supplicium ut deprecarentur.
Inde crescente paulatim pietate, omnibus de Repub-
licæ consilijs, iudicijsq; principum adhiberi cœpti primo-
res sacerdotes, nō tam ut consiliarij ac iudices, ut mea-
fert opinio, quàm ut horum arbitri: qui attenderent
ne quid forte per imperitiam aut imprudentiā Chri-
stianæ professioni repugnans decerneretur. Neq; hoc
illi modo curabant, ut ipsi domi forisq; innocēter san-
cteq; uiuerent: sed ita præerant familiæ suæ domesti-
cæ, quæ non assentatoribus, non scurris, non lenoni-
bus, aut ullis uoluptatum architectis, non nepotibus
& heluonibus, non scortatoribus, adulteris, & expu-
gnatoribus pudiciæ, non militibus, non barbaris ser-
uis & stigmatijs, uerum pijs & religiosis hominibus
& sacerdotio destinatis, atq; etiā sacerdotibus con-
stabat: ita inquam ei familiæ præerant, ut nihil in ea
esset reprehensibile, secundum præscriptum diui Pau-
li: propterea q; in se redundaturum esse iudicabant,
quicquid ea peccauisset. Neq; uero aut musicis sym-
phonijs

phonijs, aut obscenis & meretricijs cātilenis, aut impudicis sermonibus, aut minorum & scurrarum dicitate & petulantia, aut morionum ineptijs mense ipsis cōdiebantur: sed à Deo, & præcatione, & gratiarum actionis communi & sonora inchoatæ partim religioso silentio & sacræ lectionis auscultatiōe, partim sobrijs pijsq; & eruditis colloquijs ductæ & peractæ, non absimili exordij sine claudebantur. Paucissimis contenti, omnia ægenis delargiebantur, hos solos ueros certosq; thesauros suos rati: ita ut fuerit, qui cum nihil haberet reliqui, ipse redimendorum captiuorum causa seruituti se mancipauerit. Hinc fiebat, ut non inhiarent sacerdotum facultatibus profani homines, ita ut nostra tēpestate faciunt: sed omnes omnia ipsis aggerebant, uenditisq; possessionibus ad pedes sacerdotum pecuniam afferebant, ut ab ipsis inter pauperes pro cuiusq; necessitate distribueretur. Successu deinde temporis, inualecente religione, cum cædium, proscriptionum, direptionum bonorum, moctus sublatus esset, possessiones etiam & agri, regionesq; totæ sacerdotibus, utpote prudentibus & fidelibus dispensatoribus, à pijs hominibus attribui cœpere, ut esset perpetuò, non unde ipsi luxu & uoluptatibus diffuerent, aut scorta & parasitos alerent, aut uero propinquos suos ditarent: sed unde ministri ecclesiæ alerentur: unde ad templorum instaurationes & ad usus ægenium suppeditaretur: unde captiui deniq; redimerentur. Puerorum etiam atq;

iuuentutis

iuuentutis educandæ & instituendæ curâ inprimis habebāt, summaq; diligētia & magno impendio providebāt, ut in scholis ubiq; & in ludis literarijs publice docti, præbi ac diligentes magistri & formatores iuuentutis essent, qui literis pariter & bonis moribus, rebusq; de fide & religione opinionibus teneram illam ætatem, tanq; rudem lanam, tingerent. Non parum enim, sed plurimum sane interesse iudicabant, quibus præceptis rudis illa ætas, & ad omnia flexilis imbueretur: propterea quod per omnem uitam ea tenacissime inhaerent hominibus, & in naturam quodammodo abeunt, quibus à pueris assueuerunt. Itaq; recte illi dignam se eam curam esse existimabant. Deniq; omnia quasi dij quidam salutare ad salutem hominū referebant, laudis humanæ negligentes, & commodorum suorum prorsus obliti. Ex quo contemptus pecuniæ, uoluptatum, honorum, laudisq; singularis quædam fiducia & libertas orationis in ipsis existebat. Peccantes principes & monarchas, nedum priuatos, libere & aperte arguebant, obiurgabant, increpabant, dira deniq; execratione percellēbāt, oportune & importune, tempestiue & intempestiue. Nec offendere eorum uoluptates dubitabant, quibus nullo beneficio obstricti essent, à quibus nihil sperarent, nihil metuerent. Quid aut formidaret is, qui omnia uilia atq; nihili præ CHRISTO duceret? mortemq; in lucro deputeret? Hinc non admirationi modo, uerum etiam terrori erant tyranni & ar-

nificibus suis : quos pudebat , illorum constantia & tolerantia crudelitatem suam uinci. At ne tū quidem deerant sacerdotes , qui hoc indigni essent nomine & honore , quicquid dedecori essent toti ordini. Fator. Sed minus multi atque nunc : Neque iij. probra sunt gloriabundi iactabant. Neque palam prostituto pudore delinquebant , & non tam peruaciter & maliciose in præcogitata ac diu deliberata facinora sese precipitabant , quàm per imprudentiam & humana fragilitate labeantur , Deo permittente , ut condolare nosset ijs , qui inscientia & errore peccabant , cū & ipsi infirmitate essent circumdati. Et tamen non deerat medicina. Agebantur crebri & frequentes conuentus , siue synodi : ubi perquisita diligenter uicia sacerdotum , iusta animaduersione coercerantur : mores in deterius labentes corrigebantur : errores in fide , & hæreses nascentes etiamdum confutabantur , & radicitus extirpabantur : ritus atque ceremonie sacrorum in instituebantur : inter litigantes ac dissidentes pax & concordia componebatur. Quid igitur mirum , si nunc tam contemptum , ac propemodum abominabile uulgo est sacerdotium ? quando omnia hæc quæ priscos illos uenerandos & admirabiles faciebant in nobis desiderantur ? Nemo officium suum facit , ac ne norunt quidem plerique. Omnes cultu diuino & hominum nobis commendatorum salute neglecta , bonis pauperum & patrimonio CHRISTI flagiciose & indigne abutimur , & in uicarios munera no-

stra

10
stra reijcimus : atque utinam in ijs tamen delectum aliam quem probitatis atque doctrine haberemus : utinamque iij non alios porro pro se uicarios subijcerent. Et quod peius est , eò uentum est , ut nos sacerdotes esse , haberi dicique pudeat. In omne scelorum & flagitiorum genus pudore omni mortisque profligato , proiecti sumus : & peccata nostra , quemadmodum Sodoma , prædicamus. Quid mirum si contemnimur , uexamur , excitamur , diripimur , & exhibamur passim ? atque nostris quidem odio , hæreticis uero ludibrio sumus ? Recessimus de uia , & plurimos offendimus in lege : Irritum fecistis pactum Leui. dicit Dominus exercituum , per Malichiam : Propter quod & ego dedi uos contemptibiles & humiles omnibus populis. Mittam in uos ægestatem : & maledicam benedictionibus uestris. Et per Ozeam : Gloriam , inquit , uestram in ignominiam commutabo. Magis certe mirandum , si religionem Christianam non proculari uulgo & exproplodi : cum tantum absint sacerdotes , primores etiam ut possint rudes erudire , aut errantes in uiam reducere , ut uix nouerint nonnulli , quare dicantur Christiani , quamque uim habeat , & in quo posita sit Christiana religio. Quocirca mirandum non est , tam infirmo ac debili capite , egrotare & labare membra cetera. Quod nisi in hac religione nati & educati essemus , & per multos annos consuesceremus , quotus quisque nostrum esset Christianus ? quorum autem quicquid christianismo uel mine abducerent , uel premia auo-

B ijarent

arent, si in regno impiarum gentium & à religione
Christiana alienarum, quod omen Deus aueriat, esse
mus? Consuetudine enim sumus Christiani magis, q̃
certa firmaq; ratione: & cum ore profiteamur nos
Deum nosse, factis, nolo enim dicere, mente negamus.
Quamobrem? non docemur: non admonemur. Sa-
cerdotes quæ sua sunt querunt, non quæ IESV
CHRISTI: Pastores semetipsos pascunt, nō gre-
gem Dei: lac comedunt: lanis operiuntur: quod cras-
sum est, occidunt: quod egrotum, non sanant: quod
infirmum, non confirmant: quod con fractum, nō col-
ligant: quod abiectum, non reducunt: quod perit,
non quarunt: sed cum austeritate & cū potentia eis
imperant. Itaq; disperse sunt oues, eò q̃ non sit pa-
stor: & factæ sunt prædæ omnibus bestiis agrestibus
demonibus inquam & hæreticis: quemadmodū De-
us per Ezechielem queritur. Quid porro miramur
non pascere eos, qui neq; oues, neq; pabula norunt, ac
neq; quod sit pastoris officium? Quid miramur non
docere eos, qui nunq̃ ipsi didicerint? Gubernaculo na-
uis is denum manum admonet, qui prius remum ege-
rit, deinde proreta fuerit, undiq; & tempestatibus
iactatus sit, maris deniq; & locorū peritiam habeat.
Neq; ducat exercitum, nisi qui prius miles, decanus,
centurio, tribunus fuerit. Deniq; textrinam & lani-
ficium nulla muliercula exercet, nisi didicerit. Ad sa-
cerdotium uero, hoc est, ad amplissimum & difficilli-
mum regimen populorum prius uel assumimur, uel a-
spiramus.

spiramus, quam, sed malo tacere, quam gratius ali-
quid dicere. At Apostolus paratos nos uult esse,
ad reddendam omni poscenti rationem nostræ fidei.
Verum enim uero pudet dicere, dicendum est tamen:
Longe à prophanis hominibus hoc seculo sacerdotes
sacrarum literarum studio & cognitione superantur
ita ut ualde metuam, ne ad eos proprie pertineat, qd̃
per Esaiam Deus locutus est: Ecce serui mei comedēt
& uos esuriētis: ecce serui mei bibent, & uos sitietis
Ecce serui mei letabuntur, & uos confundemini: &
quæ deinceps sequuntur apud eundem prophetam.
An enim nos Patres, minus dereliquimus Dominum,
& montem sanctum eius obliuiscimur, fortunę men-
sam posuimus, & libamus super eam, quā illi, qui-
bus illa olim Deus comminatus est? An non libamus
fortune, cum fructus & emolumenta sacerdotij, nō
sacerdotium ipsum cōsectamur? Et uiuat, sentiat, cre-
datq; ut uult quisq;, dum commoda nostra nobis sal-
ua sint: si non uerbis, re ipsa certe palam loquimur.
Itaq; etiam sacerdotiorum nomine antiquato, benefi-
cia uulgo appellamus, quasi quæ non ut aliquo mune-
re fungamur, sed ut bene sit nobis, dentur. Vnde im-
pie illæ & horrendæ uoces natæ sunt, cum patrono-
rum, in beneficij loco sacerdotia cliētibus data expro-
bantium, tum clientium, mercedis nomine ea uel iac-
stantium, uel efflagitantium. Quo fit, ut omni ali-
cui cura exclusa, nocte dieq; census, decimas, fructus, &
prædia istorum ipsorum beneficiorum, ut uocamus,
B iij prius.

privatim atq; publice, uel in abaco, uel in digitis com-
putemus: Diuinas uero scripturas procul à cubiculis
mensis, contubernijs, collegijs, conuentibus, & omni
uite nocte consuetudine relegauimus. Nec sacra
prophetarum, Apostolorum, & CHRISTI ip-
sius Seruatoris nostri uerba unquam fere in sermoni-
bus nostris usurpamus, præter, quod nõ sine magno
animi dolore dico, ioci gratia, cum maxime uideri uo-
lumus argutuli atq; ridiculi. Quod quid est aliud,
per deum, si non in contemptum adducere & urbane
quasi aliud agēdo religionem Christianam oblitera-
re? At enim sunt etiam, qui docent? Vellem equidem
cum diuo Paulo, ut omnes docerēt, siue prophetarēt:
Nam hoc ille uerbo utitur. Sed & pauci sunt ij, &
quod illi docēdo exædificant, hoc ceteri, qui se ad per-
dendas fruges natos esse opinantur, aut illi ipsi etiam
doctores, impura uita sua demolitūtur. Plus mali cer-
te, quàm boni discit nunc, profana & imperita mul-
titudo à sacerdotibus: dum ad eorum uitam mores su-
os accommodat, dum eos non sanctissime loquentes pa-
riter & agentes, & uel à fide CHRISTI pror-
sus alienos, uel portentosa superstitione, à syderū dæ-
monumq; cultoribus accepta, puritatem eius contami-
nantes, studiose imitatur, & sacerdotum exemplis fi-
bi blanditur. Hoc ne, inquit, Episcopus uel sacerdos
ageret, nisi sciret malum non esse? Hoc ne ageret, nisi
certo nosset, inanes fabulas esse inferorum supplicia,
ac celestia premia: aut nero nihil referre ad hæc addi-
piscenda

piscenda, & illa euitanda, quomodo quisq; uiuat?
Nec mihi quisquam diat, non quid faciant, sed quid
doceant sacerdotes, attendendum esse, ita quidem ma-
gister noster CHRISTVS præcipit. Sed errat
quisquis nescit, in ijs, quæ ad uitam & mores institu-
endos pertinent, maiore longe ad persuadendum uim
habere uitam docentis, quàm orationem. Non enim
ut medicus non minus sanat ægros, ægros ipse, q̃
sanus: ita & morum uitæq; formator, hoc est, ani-
morum medicus. Sed ualere hunc oportet, & admi-
rationi esse ob excellentes uirtutes, si utiliter alijs me-
dicinam uelit facere. Nam qua fiducia ad dilectio-
nem proximi, & ad subueniendum ægēibus alios pa-
uocabit, qui ipse aditu suo miseros & open implora-
tes excludit? i propatulo aut obuios, ne alloquio qui-
dem, aut aspectu dūtaxat humaniore dignatur? quiq;
in conuiuia, largitiones, & alios profanos & minus
honestos usus, non centum, sed sexcentos atq; etiā mil-
le aureos nummos expendit facilius, quàm unum ad
miseri alicuius necessitatem subleuandam, aut puellæ
propter ægestatem prostaturæ, turpitudinem prohi-
bendam? Qua autem fronte docebit, non esse furan-
dum, qui ipse furatur, & per fas nefasq; diuitias sibi
parat? Quo ore ambitiosus, cupidus: uinolentos, e-
briosus: adulter, scortatores: sumptuosos, luxu per-
ditus: percussores, homicida obiurgabit? Audiet pro-
fecto: frater, eijce trabem prius ex oculo tuo, dein-
de festuam ex alieno eximes. Non tam enim, quid
B iij quisq;

quisq; dicat, quàm quomodo uiuat, uulgo animadu-
titur, praesertim in ijs, quorum cum in aperto & in a-
dito uita omnis exposita sit, illustriora longe sunt &
peccata, & recte facta, quàm caterorum, & pro le-
ge in exemplum multorum trahuntur. Itaq; dupli-
citer ij peccant, sibiq; pariter atq; omni populo perni-
ciem, sicut coecias nubes, attrahunt. Enimvero cur
nā tot ac tāta simul mala in gregē & aulas CHRI-
S TI modo ingruunt, quae non eminus prospicimus,
uerum cominus atrectamus? nempe sementis aquarū
inundatione correpta: cuius residuum comedit eru-
go: residuum eruginis uastauit bruchus & locusta:
haec & antecessit, & sequitur pestis horrenda: nec
longe abesse uidetur hostilis gladius: ut taceam inte-
stina odia ac dissidia, mutuasq; caedes, neq; sacerdoti-
bus parcentes, ac templa arasq; Dei uiuentis fraterna
sanguine respargentes: Curnam, inquam, haec mala,
priscis illis Aegyptiorum plagis non absimilia, agmi-
natim nunc in nos irruunt? Cur? nisi improborū &
officium suum non facientium sacerdotum causa.

Ego ne id temere dico? an Deus ipse per os Michee
prophetae haec affirmat? Vestri causa, ad sacerdotes
inquiens, Syon (horresco dicere) quasi ager arabi-
tur, & Hierusalem quasi acerruus lapidum erit, &
mons templi in excelsa syluarū: hoc est, uastitas om-
nia occupabit. Atq; utinam ne haec omnia extremū
omnium comitetur malū, mentium, inquam, exco-
ratio & obduratio: Cuius rei nonnulla iam existere

uidentur

uidentur indicia. An enim parum signi est, furere
& mente aptum esse egrotum, ubi is non pharmaci
modo salutaria, sed & medicum ipsum quasi pestem
quandam abhorret? Quis autem insanus unq; sic ab-
hominatus est medicum, ut nunc nostri homines, sa-
cerdotes abominantur? & cum uicia sola sacerdotū
detestari deberent, ordinem ipsum sanctissimum exe-
crantur, & perijisse cupiunt, tanquam nō salutis, sed
interitus sui authorem & administrum. Cui per-
uersissima hominum opinioni, nos ipsi, Patres, nos ipsi
inquam, nostris sceleribus & flagicijs causam praē-
bemus. Non facile enim haec uulgus disiungit, ut ui-
cium quidem hominis exosum habeat, ipsum autem
hominem diligat: & uitam quidem sacerdotum dete-
stetur, ipsum autem sacerdotij nomen functionemq;
ueneretur. Quamobrem si dignitatem uestram tue-
ri, si auctoritatem retinere, si honore & admiratio-
ne affici, si deniq; saluos uos, & eos, qui fidei uestrae
cōmendati sunt, esse uultis, Patres amplissimi & sa-
cerdotes Dei, eādem quam prisci illi sacerdotes uiam
insistite, & officium uestrum facite. Publici estis de-
precatōres, & aduocati peccatorū apud Deum: Deo
& hominum saluti, nō uentri uestro, & ijs quae in-
fra uentrem sunt, seruite: leuate puras manus ad De-
um sine libidine, sine ira, sine odio, sine fastu, sine a-
uariicia. Sal terrae estis: estote condimentum aliorū
& sapientia uestra aliorum stulticiam subleuate: et
nec ne insulsi facti, ab hominibus conculcemini, ut

B V nunc

nunc fieri incipit. Lux mundi estis? sic luceat lux uestra coram hominibus: ut uidētes operā uestra bona, glorificent Deum. Ne quaeso ponatis tenebras lucem, & lucem tenebras, ut Esaia uerbis utar.

Principes estis, & uernacula lingua nostra appellamini? Quantum honore praestatis reliquis, tantū uirtute, pietate atq; sapientia praestare cōtendite: & ne cœci cœcorum duces sitis, uidete. Apostoli estis & Angeli, hoc est, legati Dei? Ita uos gerite, ut non uirtu peretur ministerium uestrum: & uae uobis, si aut nihil, aut somnia uestra questuosa, non uoluntatē Dei populo nunciaueritis. Auīci Dei estis? redamate amantem, & ut cū eo unum sitis, omnino studete. Nihil tam charū habeatis, quod nō prae Deo despiciatis: qui prior dilexit nos, & sacro unigeniti filij sui sanguine redemptos sibi adiunxit. Diligite inter uos. Hoc enim uel præcipiū est discriminē inter amicos Dei & seruos diaboli. Christi estis? uidete ne quid indignum admittatis hoc tanto nomine, nēue Spiritū sanctum, quo uncti estis, impura uita uestra propellatis. Non enim ille habitat in corpore peccatis subdito.

Dispensatores estis mysteriorum Dei? Ita dispensate, uti exactam rationem reddituri Deo scrutatori mentium, & non modo dissipati, sed etiam defossi talenti nomine poenas daturi. Habetis clauēs regni cœlestis? auete ne eis abutamini, & ne uae sit uobis, si & ipsi non ingrediamini, & alios non intromittatis. Claritatem, quam à patre acceperat, dedit nobis. CHRIS-

stus

STVS? uidete ne eam tenebris uiciorum & ignorantie obscuretis. Pastores estis? cognoscite oues uestras: uocate nominatim: exemplo praecedite: pascite salutaribus sacrae scripturae pabulis: à noxijs uero arcete: à luporum & urforum ui & insidijs defendite: medemini languidis: sabiosas & lue infectas, caulis eijcite: errantes querite: inuentas humeris uestris ad ouile reportate: parati uitam, nedum bona ista externa & fortunæ pro ouibus uestris profunderē, ut cum uenerit princeps pastorum, percipiat immarcescibilem gloriae coronam. Dij estis? neminē ledite: benefacite omnibus, quibus potestis: hoc enim Dei propriū est: Sancti, puri, perfectiq; estote: & quantum homini antecellit Deus, tantum uos ceteros homines sanctimonia uitæ atq; perfectione anteire satagite. Aliæ enim sunt priuatorum, aliæ sacerdotum uirtutes. Nam priuato homini propemodū sat est, malum non esse, aut aliquatenus certe bonum esse.

In sacerdote uero, & eo, qui publicam personam gerit, peccatum est, si non multo anteeat uirtute multitudinem, quem trahere ceteros à uicijs ad mediocritatem excellenti uirtute oportet. Deniq; Episcopus es, hoc est, speculator domus Dei, & princeps sacerdotū? quæ sacerdotum sunt prae alijs curato: Habes præterea sacris iniciandi, & ius dicendi potestatem: uigila: praeuide procul imminētia mala, & praeuene eos, qui intus sunt: ne si quo inopinato casu pereant, sanguis eorum de manu tua requiratur. Doce i-

gnaros

gnatos: exhortare ignauos: errantes arguē: hereses euellē. Memento in consecratione tua, non codicillos rationum accepti & expensi, non syderum inter se descriptas habitudines & aspectus, non constitutiones regias aut imperatorias, uerum diuinae legis nolumen capiti tuo esse impositum, ut in eo mediteris die ac nocte, neq; recedat id unq; ab ore & a corde tuo. Metue horrendas illas Dei apud Ozeam minas: Quia tu repulisti scientiam, repellam te, ne sacerdotio fungaris mihi. Que muneris tui sunt, pleraq; per te ipse agito: Quoniam uero non potes omnia, attende a quibus uices tuas obiri uelis: ut ij, siue iudicijs exercendis praerunt, iuste, patienter, & sine compendinationibus iudicent: nō ira, non cupiditate, nō odio, nō gratia cuiusq; non spe, nō metu a recto dimoueantur: quāq; in alijs coērent, eorum ne suspitionem quidem falsam in se habere patiantur: siue doctores & pastores futuri sunt, potentes sint uerbo atq; opere: populumq; non fabulis atq; somnijs suis onerent, nō superuacaneis questionibus dissidia parientibus distineant, sed recta & necessaria recte oportuneq; doceant, & solida fidei religionisq; Christianae fundamenta in animis imperite multitudinis iaciant, in hisq; digna Deo aedificia exaedificent. Heresibus etiā atq; etiam obstant, paruulosq; Babylonis ad petram adducant. Sacramentis ne abutantur, & alijs rectum eorum usum ut ostendant. Itaq; manus nemini cito imposeris, neq; aut necessitudine, aut praeicio, aut obsequio

quio aut gratia cuiusq; adductus, sacerdotio quempiā iniuncto, aut instituto. Sed explora diligenter, quos in societatem tanti oneris assumas. Tibi, non ijs qui patroni uocantur, pro omnibus dependendū est: Tu caput es, ceteri sacerdotes membra tua sunt, & quidem de ijs membris, quibus aliquem te honorem impertiri aequum est: fratres tui sunt, non serui: adiutores, non uilia mancipia. Tu pastor es, illi canes tui sunt, custodientes ac defendentes gregem. Vide ergo ut sagaces, impigros, robustos, feroces, ualentes latrare, & qui amicum ab inimico discernere norint, eligas: & quidem a teneris unguiculis recte atq; ordine educatos & institutos. Eam porro institutionem puerorum & adolescentium, ut recta sit, & pietatem timoremq; Dei cum literis coniunctum habeat, ad te imprimis pertinere existimato. Caue ergo summo studio, id quod adhuc negligi uideo, ne pueri atq; iuuenes ad haereticos instituendi mittantur: unde boni quidem nescio an quicq; referant, mali certe plurimum referunt: neue paedagogi munus obire quispiam neq; in publico ludo, neq; in priuata domo permittatur, nisi si examinatus & probatus ab ijs, quos ad eam rem delegeris. Lectione item librorum ab haereticis conscriptorum, omnes prorsus, paucissimis exceptis, qui praestanti doctrina, & stabili sunt iudicio, summa cōtentione prohibeto. Nam sermo eorum serpit ut cancer, & suauitate quadam populari conditus, facile in uictos occupat & inficit. Cogita non tua unius causa tibi

tibi tantis copias atq; facultates datas, seu uerius con-
creditas esse. In uicia sacerdotum itemq; profanorū
hominum diligenter inquirito, ac in præfractos qui-
dem acrius, in alios uero lenius animaduertito: hos ba-
culo, quem geris, illos gladio, ferito. In ebriosos, in
belluones, in scortatores, in adulteros, in concubina-
rios, in iniustos, & oppressores tenuiorum, in homici-
das, in quadruplatores & feneratores, & in omnes
deniq; flagitiosos & sceleratos, qui palam peccant,
& admoniti non resipiscunt, neq; ecclesiam audiunt
terribilia illa fulmina in tartarum præcipitantia in-
primis uibrato, & perinde ac putrida membra à re-
liquo corpore eos resecat, ne pars sincera trahatur,
ut inquit poëta quidam: Videto ne quis re sua abuta-
tur, quod quidem etiam impij homines & idolatræ
Reipub. plurimum interesse iudicauerunt: abutitur aut
nō minus qui sordide recondit, quā qui prodige dis-
sipat. Sis deniq; per omnia, qualē diuus Paulus uult
esse Episcopum. Abbas es? pater igitur, non domi-
nus: curator, non dilapidator bonorum communium
curam habe eorum, quos in filiorum loco habere de-
bes. Vide ut ij omni alia cura uacui, soli præcationi
& meditationi rerum diuinarum insistant. Archidi-
aconus, hoc est, oculus es Episcopi? uide ne lippias,
neue ubi opus non est, conuiueas: uisita per te ipse,
cum tua proprie ad munus istud delecta sit industria
Scrutare, non quid auferas, sed quid emendes: cerne
aculū, & uisa refer Episcopo. Canonicus es? Con-
filiarius

filiarius es Episcopi. Attende ergo, ut ei consilio tuo
in regenda ecclesia, c. i seruis, præsto sis, cessantē ex-
cites, utq; id sis, quod diceris, hoc est, ut tota uita tua
recta & ad regulam CHRISTI apta sit. Pa-
roëcus es? hoc est, pastor in parte gregis, & uicarius
Episcopi? pasce, & pasce per te ipse, non per uicari-
os. Memento te non tui compendij, sed ouium causa
ad functionem istam uocatum esse, de qua exactam
Deo rationem redditurus es: uide ne tibi diatur, o pa-
stor, & idolum, & derelinquens gregem: Vis autē
paruo negotio multum operæ precij facere in uinea
Domini, cuius etiam uimitor es? Scholarum & puero-
rum recte instituendorum præcipuam curam habe.
Deniq; quæ Episcopo dicta sunt, eadem pleraq; tibi
dicta esse existimato. Decanus es? Præpositus? Scho-
lasticus? Cantor? Custos? Prior? siue quid aliud? of-
ficium tuum noscito, & facito. Priuatus præbyter
es? da operam ut purus & ablutus à sordibus con-
scientiæ, ad tremenda illa sacra peragenda accedas:
non ex consuetudine, aut quæstus gratia, ne CHRI-
STVM uendere uideare: sed ut Deum tibi atq; mul-
titudini placaturus. Ad extremum, quocunq; dice-
ris nomine, sacerdotem te esse memento. Cura igitur
ut non magis nomine, quā re sacerdos sis: utq; non
ex uestitu & raso uertice, uerum ex doctrina, mori-
bus, ac totius uitæ consuetudine, omnes te sacerdotem
esse agnoscant. Refelle, re, non uerbis, odiosum illud
uulgi dictum, ne dicaris porcus altilis. Memen-
to te

to te CHRISTI personam gerere. Ille iusticia est, modestia, temperantia, sobrietas, ueritas, sapientia, constantia, pax, charitas, benignitas, & summa bonitas. Hæc eadem tu pro uiribus tuis esse cura. Mitis est & humilis, disce ab eo humiliari sub potenti manu Dei. Monachus est sede solitarius & tace, secundum dictum Hieremie. Mortuus es mundo: ne te implices mundanis negocijs: deplora, & sine simulatione quidem, peccata tua atq; populi: terrenarumq; rerum cura abiecta, in coelestium contemplatione totus esto. In uniuersum autem omnes, qui spiritu alium nomine appellamini, hoc unum curate (ne multis uos onerem) ut uere sitis quod dicimini. Reijcite curam carnis, spiritualibus rebus solis uacate inquam & gustate, quam suauis est Dominus, omnibus qui diligunt eum, & in spiritu & ueritate adorant. Cognoscetis autem, cum aliunde, tum ex diuo Paulo ad Galatas scribente, quæ sint opera carnis, & qui fructus spiritus, quiq; finis utrorumq;: ut illa quidem nittetis, hos uero consecremini. Satis indultum est corni: satis datum mundo: satis diabolo. Redite ad cor. Deum modo, Deiq; imaginem, hominem inquam, uere & ex animo diligere incipite, iam omnia feceritis, & legem CHRISTI impleueritis. Sed ad uos iam uenio Patres amplissimi, qui huc ad consultandum in commune, ijs de rebus, quæ ad fidem pietatemq; Christianam, & sacerdotij dignitatem tuendam pertinent, conuenistis. Curate, elaborate, perficite

perficite, à uobisipsis exorsi, ut ne quid in ullo sacerdote, quod ad officium eius perineat, requiratur. Videte etiam atq; etiam, ne ridicula sint uestre iste synodi, in quibus uerborum satis, factorum præter contributiones, nihil esse uulgo iactatur. Prouidete in primis, ne quæ simultates, contentiones, & factiones in collegijs, s. ne ut uos uocatis capitulis uestris, & in omni cœtu sacerdotum existant: & ad fraternum a morem potius, quam ad fratris nomen aliquid adijcite. Ceteros porro præ uobis ne contemnatis. Caueate ne polluti sint cœtus uestri, & ne malum uestrum in domo Dei reperiatur, ut per Hieremiam Deus loquitur. Præcidite luxum, nequitiam, & auariciam sacerdotum. Concubenarios, ebriosos, negociatores, & ociosos sacerdotes seuerè coërcete. Ambitione, maximam sacerdotij pestem, radicitus euellite. Quam uellem autem ego omnesq; boni, ut eligendi & cooptandi in sacerdotiū potestas libera ecclesijs atq; collegijs restitueretur. Neq; sane recuperabit quod multi graues uiri sentiunt, pristinam dignitatem sacerdotum, neq; religio Christiana reflorescet, donec ad unius alicuius hominis arbitrium honores ecclesiastici cōferuntur. O quam laudem atq; gloriam, & uere præmium apud Deum mereretur, qui, quas aliorum ambitio & cupiditas infregit, electiones & cooptationes studio, consilio, & autoritate sua restitueret. Sed hoc, dum præsens rerum status manet, optare magis licet, quam sperare. At uos Patres prohi.

providete serio, uos per I E S V M. CHRISTVM
crucifixum, & uestram salutem oro, obsecro, & ob
testor, providete inquā, ut uerbum Dei pure & astē
ubiq; in diocesibus uestris omni populo, neq; schisma
ticis, neq; iudæis (de quibus non paucos ad fidē ultro
accedere modo uidemus) exceptis & exclusis, enunci
etur. Inite rationem, quonam modo promiscua mul
titude in urbibus, oppidis, atq; pagis ad frequentan
das, festis diebus duntaxat, sacras conciones uel blan
dē alliciatur, uel imperiose compellatur. Curate ut
conficiantur edanturq; doctorum theologorum iudi
cio, formulæ & præscripta cōcionandi, propter in
doctiores sacerdotes : ut sciant, quid & quomodo do
ceant : Ac ne qui indocti sint, in posterum caute.
Audierint, legerint, didicerint, nouerint uel præci
pua religionis nostræ capita, priusquam ad sacerdo
tij ordinem, honorem, commodauē admittantur.
Nec deinde aut turpiter ociosi desideant, aut indeco
re negociosi satagant. Sed scrutentur scripturas as
siduō : quas perinde ac ungues proprios cognitæ ha
bere debent. Nam si turpe esse iudicat scriptor qui
dam clarissimus homine libero ignorare ius ciuitatis
sue : Quid nos dicemus de illis, qui quasi regula om
nium esse debent, cuiusmodi sunt sacerdotes, si nihilo
melius ij, quā qui uis de media plebe nouerint ciui
tatis sue, quæ eadem Dei est & sanctorum Angelo
rum, leges? & quidem eas leges, e quibus salus & om
nium & singulorum pendet. Cuperem autem maio
rem

18
rem, quā nunc habetur, scholarum cū priuatarum,
tum publicarum rationem duci : ut ita instituerentur
adolescentuli, & cum uerborum, tum rerum cogniti
one instruerentur, ne illotis, quod aiunt, pedibus, ad
sacrarum literarum cognitionem adirent. In hoc e
nim ardo rei uertitur : hōc plurimum momenti ha
bet ad statum religionis uel euertendum uel stabilien
dum. Quod uidit profecto Iulianus imperator a
postata, quemadmodum testificatur Gregorius Na
zianzenus, cum euertendi Christianismi causa, scho
lis publicis, & liberalibus hac institutione Christia
nis interdixit. Sed uberius fortassis aliquādo ea de
re commentabimur. Nunc ad finem nostra festinat
oratio, quando & me uox pariter atq; latera iā, ut
uidetis, deficiunt, & uos credo audiendo me, defati
gati estis. Hoc tantum addo : Quandoquidem diui
nitus est ista uestra dignitas, Patres, diuino munere
uindictur necesse est. Ad Deum igitur confugite :
Deo supplices procumbite : reddite altissimo uota ue
stra : inuocate eum in die tribulationis, sed ex animo
Eruet uos, quemadmodū per os Davidis pollicitus ē.
Ita fiet maxime, ut rapaces ac temerarias profano
rum hominum (qui maxime propinqui uestri sunt,
quos uestro malo de patrimonio CHRISTI sa
ginatis) manus à facultatibus, bonis, ac cernicibus
uestris depellatis, facilius atq; certius multo, quā
aut legum pontificiarum simul & patriarum uindi
cta, & seueritate, aut largiendo & indulgendo ip
sis que

sis quæ poscunt : & non modo immunitatem, sed au-
thoritatem uestram, dignitatemq; sacerdotij per om-
nia recte tueamini : Quod CHRISTVS ipse
summus sacerdos, & author sacerdotij uestri
præstare uobis dignetur, qui cum Spiritu
sancto in gloria est DEI Patris
In sæcula sæculorum.
AMEN.







